

## Damak

Berita Harian, 21 April 1968, Page 6

 Article also available on Microfilm Reel NL5410



**BENAR** atau tidak benar bahawa Shukra binti Datok Kampo Radjo telah sakit kerana menjadi korban pelonchoan yang kelewat batas, Damak harap pelajaran Marabacha betul kenyataan bapak Shukra yang tersiar dalam Berita Harian tanggal 18 April, di-halaman 2.

**Kenyataan seperti itu hanya boleh lahir dari sa-orang yang berjiwa besar, sa-orang yang mempunyai sikap hidup yang luas, sa-orang pemurah dan sa-orang jujur.**

Kalau sa-kira-nya pelajar2 Mara tidak tahu siapa itu Datok Kampo Radjo, biar-lah Damak terangkan serba sadikit latar belakang-nya.

Datok Kampo berasal dari Indonesia (Sumatera Barat) dan dari masa muda2-nya sudah berjuang untok kemerdekaan tanah eyer, jadi anggota Partai Sharikat Islam Indonesia, berkursus politik bersama2 Almarhum Hadji Agus Salim, bekas Menteri Luar Indonesia. Jawatan-nya terahir dalam PSII ialah sa-bagai Komisaris.

Kemudian dia datang ka-Malaya, aktif dalam Umno hingga di-pilih menjadi anggota Dewan Negeri mewakili kawasan Semenyeuh.

Dia gadoh dengan Umno, kerana berdiri di-samping Aziz Ishak dan bersama Aziz memben-tok Parti Perhimpunan Kebangsaan.

Dalam masa konfrantasi, dia tertangkap bersama2 Aziz, Ishak Haji Mohamad dan Dr. Burhanuddin.

Jadi ayah Shukra bukan-lah sa-barang orang.

Damak petik kembali pandangan-nya mengenai peristiwa anak-nya itu untok menungan pelajar2 Mara.

“Saya menemui Enche Ghafar ada-lah untok menyampaikan perhatian sa-bagai sa-orang-bapa penuntut Institut itu.

“Saya meminta beliau bertindak terhadap kejadian2 yang berlaku di-Institut itu. Tetapi tindakan itu bukan-lah dengan membuang penuntut2 yang berkenaan.

“Tindakan Enche Ghafar yang saya harapkan ia-lah supaya beliau memberi nasihat kepada penuntut2 itu supaya jangan sampai memalukan institut itu, keluarga mereka dan masharakat umum-nya.

**“Kita tidak patut membuang penuntut2 itu walau pun mereka melakukan ragging. Kita tidak dapat meletakkan kesalahan itu kepada mereka kerana tanggung jawab mendidik mereka ada-lah pada kita ibu bapa dan guru2 mereka.”**

**Kenyataan ini sederhana, memancharkan watak sa-orang yang sederhana, yang penyabar, yang jujur.**

**Kalau Damak yang melakukan aniaya kepada anak orang ini, Damak akan merasa malu sekali.**

